



D. O. M.
T H E S E S
ANATOMICÆ ET CHIRURGICÆ.



MINORUM Corporis humani partium usus non
 semper elucet ; suam tamen quæque particula agnos-
 cit utilitatem : cave ergo ne concludas aliquam inuti-
 lem. Si Physiologica non sufficiant media , Chirur-
 giam advoca ; non solum super humani generis pa-
 themara lumen diffundit , sed & ad statum Phisici
 occulta referenda viam sæpius parat ; ipsius tramites
 sequere , & nihil in Microcosmo , ne quidem ipsummet os coccygis ,
 supervacaneum reperies (1). Re etenim verâ , num affecto coccyge ,

(1) Th. Barthol. casp. Fil. Notat Hoffmannum immeritò agnovisse tanquam
 inutile os caudæ. Anat. Reform. Libel. 4. de ossibus , pag. § 10.

vicinarum partium functiones ritè peraguntur ? nonne e contrà sessio perdifficilis , progressio molesta , alvi exoneratio admodum dolorifica , &c. &c ? Plurimarum igitur functionum ab hujusce ossis sanitate pendere videtur exercitium liberum ; illud idcirco considerabimus primò in statu Physico , deindè Dimotionem tanquam morbum ipsi frequentiorē investigabimus , tandem auxilia huic-ce morbo competentia exponemus.

§ I.

Coccyx est os exiguum in parte inferiori ossis sacri positum ; os coccygis , os caudæ , os cuculi , cuculus , spondilium , nuncupatur. Figura ipsius accedit ad pyramidalem inversam & incurvatam versus pelvim ; speciem rostri cuculini quodammodo exhibet , indè coccygis ipsi nomen. Tanquam os peculiare & omnino distinctum ab osse sacro spectari potest in infantibus & junioribus (1) ; in adultis verò , tanquam processus & continua ossis sacri substantia. Quatuor aut quinque partibus constituitur , quæ cartilaganibus inter se junguntur. Cartilagines sunt numero duæ ; vel tres ; duæ scilicet quando sunt quatuor partes osseæ , & tres quando sunt quinque. Partes illæ non semper à se invicem separantur , nec semper omnes inter se coadunantur ; nunc enim una tantum pars alias accuratè assimilat , modò duæ , aliquandò tres , cujus differentiae causa repetenda est à diversâ succorum osseorum elaboratione , quæ non perficitur nisi successu temporis (2). Harumce partium superior est major & crassior , leviter excavata in limbo superiori , inferiores verò gradatim minuuntur usque ad ultimam (3). A lateribus basis coccygis asurgunt duæ apophyses , veluti duo cornua , quæ extremitatem inferiorem ossis sacri , cum similibus hujus ossis apophysibus , complecti videntur , & insuper duæ aliæ apophyses transversæ , paululum excavatæ , quæ cum excavatione seu inscissurâ ossis sacri , efformant foramen , modò majus , modò minus , sæpissimè obturatum.

(1) Octavo mense fœtus , os coccygis totum est , manetque cartilaginofum , sed nono mense , internâ eâ parte , quæ corpus dicitur , exoritur unum , vel quandoquæ duo puncta ossea ; caput majoris aciculæ non excedentia. Theod. Kerckring. Anthropogen. Iconogr. & Fœtum osteogenia. Cap. xi.

(2) Cartilagines illas naturam suam usque ad septimum annum servare notat Volcher. Coiterus. Tract. Anat. de ossibus Fœtus & Infantis , cap. 2.

(3) Ultimæ partes coccygis aliquandò versus partem externam visæ fuerunt incurvatæ , ita ut ex indè nasceretur quædam species caudæ. Vid. Isbrand. Diemerbroeck Anat. Corpor. hum. lib. 2. cap. xii. pag. 583. & opera Autorum ibidem relata.

PARTES ossæ coccygis non connectuntur, tūm inter se, tum & cum ossæ sacro, solis cartilaginibus, sed etiam ope ligamentorum & musculorum firmari videntur. Ligamenta in lateralia & longitudinalia divisa fuerunt. Lateralia sunt quædam ligamentulorum species, quæ à partibus lateralibus coccygis tendunt ad spinam ischii cum ligamento sacro-ischiatico; longitudinalia verò sunt pariter exigua, & à facie internâ ossis sacri vergunt ad extremitatem coccygis. Musculi, quos tamen consideramus in adultis potius tanquam vincula, quam pro-ut musculos, sunt numero quatuor, & dicuntur coccygæi anteriores, posterioresque, duo scilicet in utroque latere. Musculus coccygæus anterior adhæret ligamentulo quod reperitur in parte superiore foraminis ovalis, deinde progreditur versùs partem inferiorem coccygis cui adhæret; ratione adhæisionis, ischio-coccygæus, & respectu sitûs, lateralis nuncupatur. Coccygæorum lateraliū usus in eo consistere videtur quod os coccygis hinc & indè sustinent, & impediunt ne ad unum alterumve latas deji- ciatur. Coccygæus posterior adhæret margini ossis sacri, ligamentulo sacro-ischiatico, necnon ischio; deinde progreditur versùs partem lateralem faciei internæ coccygis, cui adhæret; ab adhæisione, sacro-coccy- gæus, & à situ posterior vocatur. Coccygæi posteriores videntur non solummodò firmare coccygis situm, sed & illud adhuc mobile & flexile in junioribus magis elasticum reddere, & sic obstarè quodam modo dimotioni posteriori. Arteriæ & venæ sacræ, simul & gluteæ, coccygis substantiam fungosam, ipsiusque musculos irrorant. Nervi coccygæi, à coadunatione alterutriusque nervi intercostalis, & duobus ultimis pari- bus sacris oriuntur. Cum autem nervi intercostales communicent ferè cum omnibus corporis partibus, cum aliundè nervi sacri communicent cum partibus inferioribus & emittant ramulos ad varias partes in pelvi contentas, necnon ad exteriores coccygis vicinas (1), coccyx non potest graviter affici quin dolores latius grassentur nervorum consensu. Sic in- structum os coccygis induitur cute, & pinguedine multâ, præsertim in lateribus. Ab apice coccygis procedit ligamentum quoddam gracile, cuti & adipi subjacens; Anum utrinquè complectitur; musculo ipsius sphincteri cutaneo, qui etiam coccygi tantillū adhæret, puncta co- hæisionis suppeditat. Sed extremitas anterior sphincteris cutanei cum aliis urethræ musculis quodammodo connectitur; aliundè levatores ani, à basi coccygis ad anum procedunt, anticè cum bulbo urethræ, collo vesicæ, prostatique communicant, & latâ expansione quamdam septi transversî spe- ciem efformant quæ pelvim ocludit & diaphragmatis pressioni quasi oppo-

(1) Vid. Wind. Expos. Anat. Tract. nerv. num. 297. 357. & seq.

4

nitur. Hinc patet quanta sit confederatio coccygis cum partibus vicinis ; & quanam possit esse ipsius consideratio respectu partium superpositarum.

U s u s coccygis in eo poni videntur quod compositionem circumvallationis pelvis partim ingreditur ; insuper , rectum , & vaginam in foeminis sustinet , variis musculis punctum fixum ministrat. Curvatura ipsius introrsum vergens sessioni favet , musculis punctum fixum propius offert , illisque vim majorem præbet , ut rupturam aut distensionem insolitam non patiantur ex impulsione diaphragmatis & musculorum abdominis , nec non viscerum unâ comprimentium ; in mulieribus minorem sese præbet quàm in viris , forsan ex præsentia , pressione & pondere continuo uteri , partuum gratiâ.

§ II.

QUAMVIS multiplici medio fixum retineatur os coccygis , tamen è proprio situ pluribus modis dimoveri potest ; scilicet cum partium ossium fracturâ , cum rupturâ perfectâ aut imperfectâ cartilaginum , vel absque rupturâ & solummodo per inflexionem ipsius partium non ossificatarum , aut quâcumque de causâ relaxatarum. Fracturæ & rupturæ cartilaginum perfectæ , vel imperfectæ , in adultis reperiuntur ; inflexiones verò in infantibus , juvenibus , aut subjectis in quibus adest ligamentorum & cartilaginum flexilitas nimia. Extremitas coccygis dimoti , vel ad partem anteriorem , vel ad posteriorem , vel ad unum è lateribus dejicitur : illam dimotionem dicemus anteriorem , alteram posteriorem , & alias laterales. Anterior dicta fuit interna , posterior verò externa. Dimotionum coccygis causæ sunt variæ pro variâ ipsius speciei ; ictus & lapsus anteriorem , lateralesque , promovent , partus difficiles posteriorem excitant. Quoad fracturam & rupturam perfectam , vel imperfectam , aut etiam inflexionem absque rupturâ , præter causas modò dictas , agnoscunt gradus virium majores ex parte corporis dimoventis , & resistantiam minorem ex parte ossis , ipsius cartilaginum , ligamentorum & musculorum.

DOLORE circa anum , sensus gravitatis in eâdem parte , femorum & lumborum dolorifica conversio , urinarum molesta dejectio , fœcum expulsio coacta , partium coccygis vicinarum contusio , ipsiusmet coccygis mobilitas minor aut major , depressio , aut prominentia , tanquam coccygeæ dimotionis signa communia & dubia adhibenda sunt. Partis extremæ coccygis mobilitas major & crepitatio sicca , signum ipsius fracturæ pathognomonicum. Mobilitas in eodem gradu & crepitatio le-

3
vis, sicca mīns, cartilaginis rupturæ perfectæ indicium; absentia cuius-
cumque crepitationis, cum signis communibus modò dictis, dimotio-
nem per rupturam imperfectam, vel per inflexionem denotant; direc-
tio apicis coccygæi dimotionem anteriorem, aut posteriorem, vel la-
teralem designat. Dimotiones anteriores & laterales sunt frequentiores
posteriori, & quam plurimùm periculosiores, quia contusione & com-
motione majori stipantur quàm posterior, quæ solo partu producitur.
Dimotiones cum fracturâ aut rupturâ curam diuturniorem, quàm dimo-
tiones per solam inflexionem, requirunt.

Coccygis dimotionum symptomata, structurâ partium cognitâ;
facile evolvuntur. Nonne enim sensus gravitatis ex eo evenit quod coc-
cyx antrorsum aut retrorsum pulsus premit intestinum rectum, & parti-
bus sustinendis fit impar propter continui solutionem, aut sitûs mutatio-
nem? Num dolor vividus inter varios femorum motus aliundè oritur
quàm à contractione musculorum glutæorum majorum, qui adhærent
coccygi dimoto, proindèque contrahi nequeunt, quin dimoveatur os
coccygis, & adsit dolor, propter periostæi, ligamentorum, nervorum
& musculorum distensionem nimiam? Dolor qui per-sentitur in urina-
rum & sæcum excretionem pariter explicari potest, quia diaphragma &
musculi abdominales premunt totam viscerum abdominalium molem
versus coccygem, præterea materiæ excrementitiæ per istam viam ex-
pulsæ comprimunt transeundo partes ambientes, proindèque coccygem;
quæquidem pressiones fieri nequeunt absque dolore contra os dimotum.
Non majori negotio exhibenda venit ratio doloris vividi pertussem,
sputionem, emunctionem & sternutationem; istarum enim functio-
num exercitio coangustantur & comprimuntur cavitates pectoris & ab-
dominis, porrò illæ compressiones fieri nequeunt, præsertim subito
& valido nixu, quin oriatur pressio violenta coccygis subjacentis ex
parte viscerum abdominalium, quæ dolorifica evadit de ratione modò
dictâ.

Non solum affectus huc usquè annotati dimotionem coccygis concò-
mitantur, sed & alii graviore illam complicare possunt. Febris, in-
flammatiò, contusio vehemens, abscessus, caries, tenesmus, alvi flu-
xus, ex improvviso nonnunquam intercedunt. Imperfecta ossis repositio;
major periostæi, nervorum, ligamentorum, musculorum, & vasorum
distorsio, compressio; totius corporis commotio; dolor nimius; medi-
camentorum defectus, aut indebita applicatio, puris remora in par-
te, vitia liquorum prædominantia, hujusmodi accidentibus locum præ-
bent.

SPECIES & causas dimotionum coccygis, & etiam affectus qui comitari aut supervenire possunt, noscere parum prodesset si curatio præter mitteretur. Consistit autem in reductione partis dimotæ, contentione reductæ, & accidentibus præcavendis, aut corrigendis. Reductioni comperens sicce habet encheiresis: ægro decumbente lecto, à latere, femoribus paululum flexis & dimotis, index digitus, ut par est unctus, in anum intromittitur, pars coccygis intus prominens retropellitur quousque superficies coccygis statum naturalem exhibeat, dum alterâ manu dirigitur pars exterior; varia erit pressiois directio pro variâ dimotionis directione.

SUPERFICIES æqualis, ad formam coccygis propius accedens, absentia dolorum vividiorum, levamen notabile ægrotanti conciliatum, demonstrant os reductum. Adimplerâ reductione, partes deligatione, & sitûs ope, contineri debent; graduata splenia, medicamento idoneo imbuta, fascia figuram duplicem. T. referens, nec non scapulare, deligationem in hoc ce casu requisitam constituunt. In lecto resupinus jaceat æger, cruribus & femoribus extensis, à motibus, quantum fieri potest, sese abstinens, & aliquo à læsione elapso tempore, in sellâ perforatâ sedeat per diem. Repositio & contentio fracturæ, rupturæ perfectæ aut imperfectæ cartilaginum, & dimotionis per inflexionem, eodem modo perficientur. Liquores vulnerarii, spirituosî, resolventes, identidem parti læsæ applicati, venæ sectiones, diætâ, & quies, plerumque accidentia præcavere valent; hæc tamen, invitis mediis, oriri & urgere possunt. Tunc, venæ sectiones frequentius celebræ, diætâ austera, victus refrigerans, febris opponerentur; eâdem methodo, & topicis emollientibus, anodinis, leviter resolventibus, debellaretur inflammatio; validiora resolutentia discuterent contusionem vehementiorem, quæ aliquot diebus à primo apparatu non nunquam sese prodit. Abcessus, si quidam minitaretur, citò citius & statim atque fluidi collecti adesset suspicio, scalpello aperiendus, ut vitentur illius stagnationis sequelæ graves, nimirum denudatio & alteratio recti, coccygis caries; indè enim aliquandò fuit necessitas operandæ fistulæ ani. Si inter abcessûs explorationem detegeretur caries, tunc denudandum os coccygis, & exfoliatio partis affectæ sollicitanda; non minimam coccygis partem, hæc ce datâ occasione, haud infrequenter decidere, prænuntiari debet. Tenesmus, aut alvi fluxus, curationem methodicam per-

turbant ne? An situm naturalem servaverit os reductum, an verò prævæ digestionēs, aut canalīs intestinalis irritatio, prævaleant, sedulò perpendendum, & detecta causā secundū artem debelletur. Tandem, vulnera in primo instanti læsionis coccygeæ ipsam complicare potuissent; illorum cura dirigatur, pro variā vulneris specie, & semper habita consideratione dimotionis ossæ, nec non affectuum circumstantium. (a)

(a) Dimotionem coccygis luxationis nomine non donavimus, quia luxatio supponit articulationem, quæ non reperitur in coccyge, sed potius symphisi locum cedit. Vid. Tract. de Morb. Ossium, à M. Joan. Lud. PETIT, tom. I. cap. 5. in quo variæ Observationes de isto Morbo perutiles reperiuntur.

Has Theses, DEO JUVANTE, & Præsidi M. STEPHANO PETRO LELAUMIER, Artium & Chirurgiæ Magistro, tueri conabitur CLAUDIUS DUPONT, Lingonensis, Artium Liberalium Magister in alimâ Universitate Parisiensi, Regis Chirurgus ordinarius, nec non Regiæ Loricariorum legionis nuper Chirurgus major.

De Langres

P A R I S I I S,
IN REGIIS CHIRURGORUM SCHOLIS,
Die Sabbati 25^a Septembris. Anno R. S. H. 1762. à sesqui-secundâ
post meridiem ad septimam.
P R O A C T U P U B L I C O
E T S O L E M N I C O O P T A T I O N E.

Typis P. AL. LE PRIEUR Collegii & Acad. Reg. Chirurg. Typographi,
viâ San-Jacobeâ, sub signo Olivæ. 1762.

